

Genocid znanja!

Sjećate li se poslijeratnih guvernera, ministara, direktora i prodavaca čini se dobro osmišljene politike, da se u Bosni i Hercegovini obogati 30-ak familija. Privatizacijska pljačka certifikatima, bio je prvi korak te „strategije” razvoja BiH!

Pokupovali su tada sve što su mogli, a što nisu pustili su da se raspada. Gdje su sada ti bivši veliki igrači?!? Neki uživaju u plodovima svoje pljačke, neki su na univerzitetu, a neki na nje-mačkoj baušteli.

Neki su i umrli.

Gdje su iz tog doba štrajkači, neuvezani staž, neisplaćene plaće radnicima. Većina je umrla!

Ono malo što je ostalo je iscrpljeno, čeka da namiri 65 godina starosti i dobije crkavicu od 350 maraka. Gdje su *Kombiteks*, *Željezara*, *Polietilenka*, *Šipad*, *Bina*, *Agrokomerc* i druge kompanije koje su zapošljavale hiljade radnika?

Rasparčani dijelovi tih nekadašnjih, poznatih giganta, trenutno su u završnoj fazi pljačke, u dobro osmišljenim stečajnim postupcima, da se proda ono što je od njih ostalo. Osim Agrokomerca koji je u međuvremenu postao svjetski prvak u stolnom tenisu, jer godinama igraju s njim ping-pong Vlada USK-a i Vlada Federacije!

Nekako u to doba, počeo je još jedan proces urušavanja države, ovaj put kroz sistem obrazovanja, naročito visokoškolskog! Smišljeno i veoma lukavo, proces sticanja diploma (bez učenja) koje danas na našem kantonu simboliziramo kroz riječ „Ljusina” nastavio je ono što su ubice naše BiH zamislile jer onaj narod koji

nema znanja-nema ni državu!

Naravno, ni javni univerziteti u BiH ne mogu se izvući iz ove priče, laže ko drugačije kaže!?!?

Uglavnom, oni prije, opljačkaju državu za marku, ovi sada, sa „diplomama”, nemaju više šta da prodaju, jer je država ogoljena do bola, osmislili su nove pljačkaške modele. Moram priznati, vrlo su kreativni, osmislili su ti nikad na um palo ne bi! Kako pljačkaju, pa lako! Plaće, paušali, komisije, odbori, radna tijela, putni nalozi, službeni telefoni, auta, pa kad vreća počne da se prazni, krediti MMF-a malo kesu napune, pa opet ispočetka. Pa kad i toga nestane, onda krene bolnica, lijekovi, esencijalne liste. Kaže mi dajdža neku noć, ne može u banje na liječenje, nema kartona, izuzela ga policija.

Reko' što?

Kaže, dopisivali lijekove na moj karton.

E pa svašta?!

Pa kad i toga ponestane, onda preko upravnih odbora ne nabavljaš anestetike, već platiš dobavljačima koji plate tebe, a drugi „nek čekaju”! Ugovori o obavljanju usluga, nabavke!

Još su kreativniji u postavljanju ljudi na funkcije i za rukovodioce u javnim institucijama. Tako, prvo radno mjesto budeš predsjedava-



Prof.dr.sc. Vildana Alibabić

jući Skupštine USK-a ili ministar. Ili, završiš fakultet sa 60 i postaneš direktor, i eto ti prilike da napraviš dobru karijeru, pošto je nisi uspio napraviti cijeli život. To je kod nas model cjeloživotnog učenja!!!

Tako redom...gdje god za grebeš...diploma!!!

Ili...genocid znanja!!

Znanje se kod nas istopilo, nestalo. Prvo zato jer su nam '92. ubijali one sa znanjem, upravo da nam otkinu glavu, drugo zato jer to sami sebi činimo od 2000. pa na ovamo.

Da li je ovoliki broj univerziteta stvoren sa nečijom namjerom da nam u potpunosti unište znanje, to ne znam, ali ono što sigurno znam je da svi oni koji su završili silne Ljusine, i razne seoske katedre (uvrijedite se vi koliko god hoćete), pa mnogi od vas i javne univerzitete, vi nemate znanje...vi imate diplome...!?!?

Problem je u tome što ljudi koji su na pogrešan način (bez učenja) došli do diplome, pogrešno rade sve u životu, funkcioniraju u svojoj pogrešnosti, jer ko jednom potpiše pakt sa šejtanom ni stotine hiljada džuma -namaza iz tog pakta ga neće izvući!!!

A...danas su baš nešto gužve petkom (čast pojedincima)!!!

Osim ako se ne osvijestite do oktobra. Pogotovo Vi, Vas 50% koji ne izlazite na izbore. Vi, koji kažete da vas nije briga. Vas se to ne tiče. I Vi mlađi, zar stvarno mislite da je život samo u Njemačkoj. Život je ovdje dragi moji, samo ga morate uzeti u svoje ruke!!!

Morate shvatiti da jedino Vi možete zaustaviti neminovnu propast svoje države i naroda, koji su evo i na ovaj način uz pomoć unutarnjih „diploma”, osmislili neprijatelji jedine nam domovine, Bosne i Hercegovine.

Lijepo vas sve pozdravljam! Ljutite se koliko god hoćete, komentirajte, prozivajte me...pišite o meni ružno..., ne možete mi ništa...

Poslije toga stanite pred ogledalo?!?

Odgovorite mi šta vidite, ako imate znanje?!?

Znanje je ključ opstanka i napretka, a Vi kako hoćete!

